



Tē 10 kî 2001/9/20

2000 nî 5 gòeh 20 chhòng-khan

- ◆ Chóng-pian-chip
- ◆ Pian-chip kap Khan-thâu Siat-kè
- ◆ Publisher

*Tēⁿ Si-chong
Koa Khá-lē
Ko-hiōng Tâi-gí Lô-má-jī Gián-síp-hōe*

911: Kái-piàn Sè-kài ê Chit-kang

Tiuⁿ Hók-chû Hōe-tiúⁿ

Góa éng-óan, éng-óan ê kì--tit. 2001 nî ê 9 gòeh 11 chit-kang!

911 hit-àm 9 tiám 35 hun, góa hā-pan sái-chhia beh tñg-khi chhù--nih, góa kā chhia lāi ê la-jí-oh chūn--khui. Hm?! ICRT im-gák chiat-bòk ná ê bô--khi? Chú-chhî-jîn teh kóng sím-mih? Hâⁿ! Bí-kok ê Kok-hông-pō hō hui-ki lòng--tiòh teh tōh-hóe? Kiám chin..ê? Kóng-chhiò? Jú thiaⁿ jú kám-kak m̄-sī-sè. Kàu chhù, kín kā tiān-sī phah--khui.(Góa í-keng chiok kú m̄-bat khòaⁿ tiān-sī..ah.) A-niâ-oê! Niú-iok ê Sè-kài Bō-ék Tōa-lâu hō hui-ki lòng chit-ē tñg chò kúi-nā kòeh! Che kiám sī ‘lâng’ chò ê chhut--lái ê tāi-chì? Hui-ki lāi ê lâng, tōa-lâu lāi ê lâng, kap kiap hui-ki ê lâng ū sím-mih oan-siû? Koh khah án-chóaⁿ siūⁿ mā siūⁿ bē kàu! Siūⁿ bē kàu chit-má iáu-koh ū chit-khóan ūi-hóan ki-pún jîn-sèng ê tāi-chì.

Chit-khóan chò-hoat sī kong-khai kap chôan tē-kiû ê lâng chò tûi-thâu. Sī tûi jîn-lûi bûn-bêng ê chau-that kap bú-jiòk. Sī hâi lâng mā hâi ka-kî ê hêng-ûi. Chit-khóan chò-hoat, kong-khai tî tiān-sī hòng-sàng, chòat-tùi ê chō-sêng bô hoat-tō àn-sng ê siong-hâi. Ú iūⁿ khòaⁿ iūⁿ. Chin chê lâng, sím-chì gín-á, mā khó-lêng ê ôh tiòh chiah-nih chân-jím ê chhiú-tôaⁿ. Chióng-kî bóe--á, tē-kiû téng só-û ê lâng lóng ê siū-siong, piàn-chò pī-hâi-jîn! Lék-sú ê chò chèng-jîn lâi sím-phòaⁿ hiah-ê chân-pòk ê kiap-ki-hôan.

21 sè-kí ê bûn-bêng ê jîn-lûi èng-kai sī: tî bô kâng ê bûn-hòa, chèng-tî chè-tō, gí-giân, seng-òah hong-sek ê tē-kiû--nih, hō-siōng chun-tiōng kap hō-siōng him-siōng. Bô kâng-khóan ê siūⁿ-hoat, chû-tiuⁿ, tiòh ài iōng bîn-chú ê cheng-sîn, bûn-bêng ê chhiú-tôaⁿ lâi kái-koat. Góa mā ñg-bâng Tâi-bûn-kài ê iú-chì lóng sī án-ne. Che chiah sī Tâi-ôan ê hok-khi.